



Il center da paraplegia a Nottwil.

MAD

Nottwil: center da paraplegia cun success

1,8 milliuns fautors e donaturs l'han sustegnì 2013 cun 75,9 milliuns

■ (anr/gc) **Pli che 1,8 milliuns commembers, fautors e sponsurs – ed en tut 1,06 milliuns tegnairschasas – han contribuì l'onn passà total 75,9 milliuns a la Fundaziun ed Uniun svizra da paraplegia cun ses center a Nottwil (LU).** Cun in tal dumber da commembers è questa fundaziun la segund gronda da NPO (organisaziun da na profit) che vegn sustegnida da 20% da la populaziun svizra. Il dumber da tegnairschasas che pajan è creschì l'onn passà per 48 000 commembers. Ins è pia fitg datiers dals 50 000. Cifras imposantas!

Impundi blers meds per la rehabilitaziun

Las expensas per segirar e promover la rehabilitaziun da carstgauns da paraplegia han muntà a 40,3 milliuns. Da quels meds èn 17,5 milliuns vegnids impundids per pertutgads directamain. Summas considerablas èn vegnidas dadas per custs da tgira na cuverts e sco agid direct als commembers.

Tar 933 pazients staziunads – da

quels 191 en l'emprima rehabilitaziun – èn vegnids prestads pli che 50 000 dis da tgira. Il total da quels è s'augmentà davent da l'avertura da la clinica speziala (1990) sin pli che 1 milliun. Ils 140 letgs èn stads occupads per 98,8%.

Per optimar il tractament ambulat da carstgauns cun paraplegia hai dà l'onn passà diversas innovaziuns. La vasta purschida da servetschs per la meglra integraziun è stada fitg tscherchgada ed ins ha anc fatg studis supplementars per pudair ademplir adina pli effizientamain la finamira ed incarica.

Dà agid immediat

Nagin n'è numnadamain preservà d'ina paraplegia. E sche quai succedia, alur basegnia el grond agid. La fundaziun e l'uniun da fautors dattan – en cas d'ina paraplegia che lia permanentamain vid la sutga cun rodas – immediat ina contribuziun da 200 000 francs.

Il center – er in impurtant factor economic

Il center da paraplegia è er in grond

factor economic per Nottwil e l'entira regiun da Sempach.

Sin la glista da pajas figuravan 2013 en tut 1467 personas (36 dapli che l'onn avant).

Per salarisar è vegnì dà 115 milliuns. La svieuta dal center ha muntà a 217 milliuns. Uschia tutgia quel tranter las 20 pli grondas interpresas da la Svizra centrala.

Plazzas cumplainas datti 1121, occupadas per 65% da dunnas e cun 85% da Svizras e Svizzers. Recrutar avunda forzas da lavur capavlas na saja era per il center a Nottwil betg lev.

Fundà da Guido A. Zäch

Il Center svizzer da paraplegia a Nottwil è vegnì fundà 1985 dal medi e politicher *Guido A. Zäch* cun l'intenziun da rehabilitar cumplainamain carstgauns da paraplegia.

Quella Fundaziun edescha quatter giadas ad onn la revista «Paraplegia». Insaquants onns è quella schizunt cumparida en rumantsch.